

Amaruba ga Yuda Indangiriro

Yaga maruba ga Yuda, gayerekiini ngiisi kwa'bigiriza be'bibeeshu bali mu kizi yifunda mu bitalaalwe. Bali mu kizi tebeereza kiri ne'bizeeze. Kundu kwokwo, Rurema agaki bahaniiriza.

Ikyanya abandu bali mu giriirira amabi mwene yago, ulukogo lwa Yesu lutangaki batabaala. Yuda anabahanuula kwo bakizi ba makengwa ku bandu mwene yabo, iri banakizi bayigiriza amagambo ku njira yo'kuli.

Muziizi muguma gwi'sikamiro, guli gwa 24-25: «Rurema ye shobwiri ukukizi mûlangu, gira mutagwe. Anamûyimangike imbere lyage mu kati ko'bulangashane. Munashambaale ngana-ngana! Munabe buzira kashembo kooshi. Yehe naaho, ye Rurema witu na Lukiza witu. Akizi yama alyagagi no'bulangashane, no'bukulu, no'bukalage, no'bushobozi mu kati ka Nahamwitu Yesu Kirisito! Bikizi ba kwokwo, ukulyokera ku kyanya ikihugo kitazi bumbwa, halinde buno, halinde ukuhisa imyaka ne'myakuula!»

Íbiri mwo ku bwofi

a) Indangiriro (1-2)

b) Ngiisi íbitumiri Yuda âli loziizi ukuhangana na'banabitalaalwe (3-4)

- c) Ngiisi kwo Rurema akahana abanabita-laalwe baguma mu Bibiriya (5-7)
- d) Ngiisi kwa'bandu bâli bihuusiri bweneene ku kyanya kya Yuda (8-13)
- e) Ikihano kyabo, kikagwanwa kyadetwa ukulyokera kare (14-16)
- f) Tukizi shomba amabi, iri tunarongoorwa no'Mutima Mweru (17-23)
- g) Yuda agashaanira abasomi, mu kusezerana (24-25)

Indangiriro

¹ Yaga maruba, galyoka imwani, nie Yuda. Ndi mukozi wa Yesu Kirisito, na ndi mwene wabo Yakobo. Gatumwa imwinyu, mwe Daata Rurema keera akahamagala, anamùkuuziri. Yesu Kirisito naye, agweti agamùlanga.

² Mukizi bonerwa ulukogo, munakizi longa no'mutuula, no'rukundo ku bwingi!

Íbigaaba ku batatwaziizi Rurema

³ E bakundwa baani! Ndákola no'mwete gwo'kumùyandikira amaruba hi'gulu lyo'bukize bwitu tweshi. Halikago buno, bikoli ngwiri-iri ndee mùyandikira yaga magambo hi'gulu lyo'kumùsikamya. Kwokwo, lyo mulonga ukulwira ubwemeere bwo Rurema akasikiiriza abandu baage. Yubwo bwemeere, mukabusiki-irizibwa lyerirya liguma naaho. Kukanaba ku lwoshi. ⁴ Abandu babi ábatatwaziizi Rurema, keera bakamùyishesheza mwo ku bumbishwa. Banakolaga mu shobania amigirizo go'lukogo lwa Rurema, mbu lyo balonga mwo'bulyo bwo'kukizi sambana. Bagweti bagalahira Yesu

Kirisito, ndaanaye gundi Nahamwitu mukulu ye tugweti. Yabo bandu, bakoli rindiriiri ikihano. Keera kikanagwanwa kyayandikwa hi'gulu lyabo!

⁵ Ndoziizi ukumukengeeza ngiisi byo Nahano akagirira Abahisiraheeri, kundu mutuula mubiyiji-yiji. Kundu Nahano akabalyosa mu kihugo kye'Miisiri, haliko ikyanya bakalahira ukumúbiika kwo'bwemeere, anabaminika.

⁶ Kiri na'baganda baguma, ikyanya akabaheereza ubutwali, banabugayiriza. Banatyozza na ho bâli tuuziri. Kwokwo, Rurema anabadendeka ne'mirinda halinde imyakuula, banabeera mu kihulu. Anabalindiriziizi ulusiku lukulu lwo bagatwirwa kwe'maaja.

⁷ Mukengererage na ku bandu ba mu kaaya ke'Soodoma, na'ba mu ke'Gomora, na'ba mu twaya twe'butambi. Mukuba, nabo, bâli kizi yidulumbika mu bitalaalwe. Abashosi banakizi higula, mu kushulehana boonyene kwa boonyene. Kyanatuma bagalibuukira mu muliro gwe'myaka ne'myakuula. Abandu ba zeene, bakwiriiri bakizi balolera kwo'mugani.

⁸ Yabo bandu babi, bagweti bagafundaga amagala gaabo mu byaha, hi'gulu lye'birooto byabo. Bagweti bagagayiriza ubutwali bwa Rurema, iri banatuka ibiremwa bya mwi'gulu.

⁹ Si kiri na Mikaheeri, umuganda mukulu, ikyanya akahambanwa na Shetaani hi'gulu lye'kirunda kya Musa, atanagira mbu alege Shetaani ku bitusi. Si akamúbwira naaho: «Nahano abe ye gakukanukira!» ¹⁰ Yabo bandu babi, bali mu tukaga byo batayiji. Kiri ne'byo bay-

iji, babiyiji naaho ku bwenge bwe'nyamiishwa izitali mu yisaliza. Binali byo biri mu bashereeza. ¹¹ Yayewe imwabo, bwe'mikolezi yabo yo miguma ne'ye'mwa Kahini. Banagweti bagakulikira amahube ga Balaamu, mu kukizi tibitira imbembo zo'kugendi kola amabi. Banakolaga bahuni, nga kwo Koora akahuna. Na ngiisi kwo akashereezibwa, kwo nabo bagaki shereezibwa.

¹² Ikyanya muli mu shangiira ibyokulya mu kati ko'rukundo, yabo banakuhambwa bali mu muyifunda mwo buzira shoni. Banabe tushembo mu kati kiinyu. Balyagagi bangere babi, banagweti bagayihahalira boonyene. Banali nga bibungu biiru ibiri mu yehulwa iyo munda ne'yo munda, buzira kulyoka mwe'nvula. Banali nga biti ibikoli hangaliri. Bitali kwe'bitumbwe, keera byanakuulwa. ¹³ Bagweti bagagirira ibikoleere ha bweruula, nga kwe'midunda mikayu iri mu birindula ibitwange mu nyaaja. Banali nge'ndonde izikoli habusiri. Kyo kitumiri Rurema akoli balindiriziizi ho bagabeera imyaka ne'myakuula, mu kihulu kya namudidi!

¹⁴ Hinoki, shokuluza witu wa kalinda ukulyokera ku Hadamu, âli mali gwanwa atanga ubuleevi hi'gulu lyabo kwokuno: «Lolagi! Nahano agweti agayija ne'binoono bya'baganda baage beeru, ¹⁵ gira ayiji twa imaaja za booshi. Ne'ri abandu bangaba bakamúgayiriza, agabahaniiriza ku byaha byabo. Mukuba, ikyanya bâli kizi biyifunda mwo, lyo bâli kizi múgayiriza. Agabahaniiriza na ku magambo go bâli kizi mútuka kwo ku buraakari.» ¹⁶ Yabo bandu babi,

bali mu lukumba, no'kuyidodomba. Bayamiragi bali mu yifunda mu bya'mifwije gaabo mabi. Banali mu yihaya, iri banakizi vugiiriza abaabo, mu kubalyeryega.

Mukizi yama musikamiri

¹⁷ E bakundwa baani! Mukizi kengeera amagambo ge'ndumwa za Nahamwitu Yesu Kirisito. Mukuba, keera zikamubwira kwokuno: ¹⁸ «Mu siku ze'mberuuka, hagahulukiraga abandu bo'kushekerezania, mbu yuuhu! Bagakizi yifunda mu mifwije gaabo ge'kipagaani.» ¹⁹ Yabo babi, bali mu teerania Abakirisito. Na bwo bakabutirwa mu mabi, gali mu batwala kasinge-singe. Batanali mwo'Mutima Mweru.

²⁰ Haliko mwehe, mwe bakundwa baani, mukizi yiyubaka mu bwemeere bwinyu, bwo buli bweru pepepe! Munakizi huuna Rurema mu kati ko'Mutima Mweru. ²¹ Mukizi yama mutuuziri mu rukundo lwa Rurema, iri munalindirira kwo Nahamwitu Yesu Kirisito agamuleetera ubulamu bwe'myaka ne'myakuula ku lukogo lwage.

²² Iri umundu angaba ali ne'migangaanwe, mukizi muyuvwirwa ulukogo. ²³ Na'bandi, mukizi bakondoola mu muliro, gira mubakize. Abandi, keera bakayiyulubaza. Yabo nabo, mukizi bakejeerera. Kuguma na yibyoy, mukizi ba makengwa mu kati kaabo. Mukizi shombaga bweneene kiri ne'mirondo yo bayiyulubaza mwo, mu kugira ibitalaalwe.

Ubwivuge imwa Rurema

²⁴ Rurema ye shobwiri ukukizi mùlanga, gira mutagwe. Anamùyimangike imbere lyage mu kati ko'bulangashane. Munashambaale ngana-ngana! Munabe buzira kashembo kooshi.

²⁵ Yehe naaho, ye Rurema witu na Lukiza witu. Akizi yama alyagagi no'bulangashane, no'bukulu, no'bukalage, no'bushobozi mu kati ka Nahamwitu Yesu Kirisito! Bikizi ba kwokwo, ukulyokera ku kyanya ikihugo kitazi bumbwa, halinde buno, halinde ukuhisa imyaka ne'myakuula!

**Ibibiriya: Igambo Iya Rurema mu ndeto
ye'kifuliiru
Fuliiru: Ibibiriya: Igambo Iya Rurema mu ndeto
ye'kifuliiru (Bible)**

copyright © 2018 Wycliffe Bible Translators, Inc.

Language: Fuliiru

Contributor: SIL International (in Africa)

All rights reserved.

2020-11-17

PDF generated using Haiola and XeLaTeX on 3 Feb 2023 from source files
dated 29 Jan 2022

871cddeb-c358-58e1-a46a-1b6006a51f3b